

حيون صابره

مواويل على طريق السفر

شعر

تاج الدين محمد تاج الدين

الهيئة العامة لقصور الثقافة
أقليم وسط الدلتا الثقافى
فرع ثقافة كفر الشيخ

إبداعات إشراقة

1

٢

عيون صابرة

شعر: تاج الدين محمد تاج الدين

الناشر: فرع ثقافة كفر الشيخ

الطبعة الأولى، القاهرة ١٩٩٩

٢

أروى
ميره
منار
فروع لشجرة مايله
طالها الريح فى الخريف
شا ... هنّده ..
بداية الارتحال الشفيف،
واللهفه،
والقلب الخفيف
وزعقة الانقضاخ
ع السُّكات والرضا
لكل شئ مرفوض؛
حتى ولو ممكن!!

تاج الدين

مواويل على طريق السفر
[بداية السفر]

منين يكون بدء الكلام والقول
وصدرى مخزن الحديث على طول
بيفتفت الكلمة اللى ليها حول ..
ويركّب كل الحروف فى كلام !

وانا شاعر بقاله سنين
داير مع المخاليق ،
من فين ؟!
ولفين نصبح نروح على فين
معرفش.
أصلى مش هنا من عام
أو من سنين.

حلمت ياما إننى أكون شاعر

والشعر

عايزنى أكون واعر

ما انساش ..

واتتى للهوى فاكرا!

والهوى زود جروحي. آلام !!

والهوى ساعة مايبقى شديد

بيهب فى درب الحياه مواعيد

مواعيد بالصبر عايزه عنيد

ومش كل الهوى يتقصد أحلام

- ١ -

في ساعات...
الكلمة بتهرب مني..
ساعات!
وأنتي أعافر،
لما ضوافري تقطع.. جدران صبري الحى،
م التفتيش في حوارى بلدنا..
وناسنا
وصدرى

من غير ماتطل براسها الوردى.
وألقى الورد/ الضى/ الكلمة ..
فى نهاية السكة :
حنينى وشوقى وخوفى
واللهفة على الأيام الضايعة، تنن ..
بتخضر دمي شروق .. ونايات
بتهل قصايد شعر على السرايات ..
... ..
الحلم بيعلا لفوق ع السطح ..

وحياة الناس حكايات حكايات
والتعلب فات فات ..
واتصور نفسه خلاص بقى سبع
قام هل الورد ضفاير نور .. مواويل
وادانى مثل .. عن شكل الويل
واراى النور قتال لليل ..

وازاى الليل يفرق فى النيل
النيل النيل
... ..
وياعبنى ياليل
وحبيبي كتب فوق المناديل :
«وفى المغريّه
ولون الشفق بيملا السما
رأيتك حبيبي يتوب الغيطان

بترسم بإيدك..
شموس المدى البرتقانيه ..
وهيه بتغطس في نيل الهوى
وشط الأمانى مخضّر زهور
الأمل ليّه ،

،

حبيبي ..
أنا لك طيره ..
تحب المدايه»

- ٢ -

الشوق عطش
نشفتلى ريق قلبى اللى قدد م الحريق
والشوق يضيق
يجرفنى شوقى والحنين على صدرها ،
والشوك طريق
يغرز فى قلبى اللى رماه هذّ التعب..
من فوق رصيف الدّجدره، وغدر الزمان..
لما لبطن السكه، تلعبه العواصف..
لعبه لم ترحم غريق.

حبيبتى ..
ياما يا اليتيمه
من فين يطول العمر أو يهنا الطريق
من فين أكون ..
وتكونى الونيسه اللى تبلّ الرّيق
يمكن أقصرّ سكّتى ..
بمحبّتى !

- ٢ -

بافوت ع البيوت -
فى عزّ الليالى -
أعدّ البيان
وأنظر بعينى .. لفوق ع السحاب ..
ما بين الشجر
أشوف القمر .. لإمتى بيان
لنصّ الليالى ؟
لوقت السحر ؟
لحدّ الأدان ؟

وافتفت في حيرتى ..
وقللى ياخذنى لطريقى اللى ملهوش علامه..
واسمه القدر
واعيش ع الأغانى .. وحلم الأمانى..
ويوم السفر !
على الله يا ضيقتى يفكك نغم ..
نغم .. نغم !
وأنظر بعينى لفوق ع السحاب ...
يغيب القمر !!

- ٤ -

كَبُرْنَا ..
واتمَدَّ بينا العُمُر ..
بساط من الأيام .. مفروده
نتلَمَّ ع الضحكه
وف ساعة الفُرقه .. بنحْن للعوده
ونعِدْ في الأيام .. وينسى أعمارنا ..
وقلوبنا مشدوده
حبيبي يا مسافر ..
حتجَمَعُنَا السنين ؟

- ٥ -

حبيبتى سماره ..
وصلنى الكلام
وشفت المعانى ما بين النِّغم
فى ساعة خروج الحروف من شفائيك ..
ملانه بشحنة عواطف حنينك ..
وشوقك بيطرح فى قلبى سلام

حبيبتى سماره.. يا ستّ البنات
ببات فى الليالى يهددنى صوتك
وياقرا عيونك فى ساعة سكوتك ..
قصايد محبه
وحبه بحبه ..
بتطرح قصايدك فى قلبى أمانى
واشوفك فى حُصنى ..
عروسه وأغانى ..
وورده فى بيت ..

وساعة ما اسافر فى سكة سفر
أعدّ التّوانى
وأشوفك رجوعى ..
وأكلّى وجوعى ..
وشهوة غريق الصراع للحياه
ولهفة حبيبى فى ساعة لقاء ..
وأشيله ف ضلوعى

حبيبتى سماره
وباكتب اليكى .. وقلبى مدينه
زاحمها المشاعر كناس فى الحوارى ..
بتدفع جموعها - جميعاً - جماعه ،
تهاتى وتصرخ
تأوت فى جوعها فى يوم المجاعه !!

أنا المستحيل اللي سارى ف ضلوعك
أنا المستميت اللي قايد شموعك
أنا المستعان فوق ضلوعك بجوعك
أنا القلب ينبض حنين الأغاني
أنا الورد يطرح فى قلبك أمانى
أناك اللي جاني ..
فى يومى وليك ..
بعطر الثوانى

مواويل على طريق السفر
[بحور المحبة]

النيل ..
بيسرح كل ليله بالربابه فى البلد
يحكى حكايات كثيره
عن حبيبه .. وعن حبيب
عن حبيبه لابسه طرّحه .. وحلم فرحه .. وبيت وطفل
تمشى تضحك للسحاب فوق فى السما ..
وتشوف ما بينه البدر طالع يبتسم .. تقول : يا جُوز
.. ربّما بين المسا وبين الصباح .. ربّك كريم ...
وحدّ عارف رزقه فين ؟!

*

ويمدّ النيل الحنين كل ليله فى البدارى ..
زيه زى
ليله يشبه فيه نهارى
تحت شجره ..
نقول كلامنا تانى م الأول

- ١ -

دَقَّيْتُ عَلَى صَدْرِي .. وَشَمَّ الْمَحَبَّةَ
نَبَتَتْ فِي قَلْبِي حَبَّةٌ حَبَّةٌ ..
ثَوْرَةُ الصَّبْرِ ، وَالْعِنَادِ
وَقَادَ النَّهَارَ فِي قَلْبِي مِنْ جَدِيدٍ
شَمْسُ الضُّحَى
وَالظَّهِيرَةِ
وَطَرَحَتِ الْجَمِيزَةَ ضِلًّا
مَفْرُودَ حَصِيرِهِ فِ سَاعَةِ الْقِيَالَةِ
وَقَلْبِي ، وَالشَّغَالَةِ ..
بِيفْرِشُوا الطَّرِيقَ بِالْعَسَلِ .. لَجُلِّ الْحَبِيبِ حِ يَفُوتِ
لَا بَسَ حَرِيرِ سِنْدَسِي ..
وَمَرْوَقُهُ بِالْفُلِّ .

منين الخروج.. يا شوقى المشعوط
فى ثورة سنيى حنيى نيران
بافتح عنه فى نور الصباح ..
أشوف الأمانى بتغطس وتغرق
والاقيى داير مدروخ ألبط !!
ومن كل مطرح بتمرق رياح ..
تصفّر وتصرخ ...
منين الخروج ؟
منين الخروج !

واهيم فى الشوارع ليلاى ،
أعيد التاريخ اللى فات من سنيى
وأشوف اللى كانوا يشيلوا الحمولة ببصيره
يوماتى.. شالوها لفين ، جابوها منين ..
ومين اللى حلّ المسائل ، ومين.. ما بين التناقض
يحلّ الزمن !

وقامت ممالك .. ونامت ممالك!..
ومين اللى صاحي.. ومين اللى هالك!
منين المسالك تودى لقين.
ونارى ، ما بين الضلوع / المحبة
ونور المحبة .. يقيد المداين .. وتضوى المدن ..
علامه .. ووشم .. ورايات
ومتأخذونيش ..
فكل الفوارس .. بتركب حصان المصاعب فى حلم/
بتبدأ بحلم انتفاضه طليق ،
رقيق الندى ،
وديع الحمام ،
ويصبح خريطه وطريق للمرام

بتغرب الشمس ..
وتسبح فى بحر الضلام الغطيس
تدور فى جوفه على المستخبى ..
وايه راح يكون
وامتى الأوان !!
ويا قلبى يا بيض
يا تايه فى عينى اللى من غير جفون
ونظرتها تلمع .. ولا من معانى ..
ودايره تصقف .. تعطف أغانى .. ولا ليها معنى /
ولا راضيه تعتق ودانى ، الأغانى ..
بتمرق فى جوفى .. وتكمش فى جب
وكل اللى تقدر تقوله : انه حُب

وشمسي بتغرّب ..
وتسبح في بحر الضلام الغطيس
لكني باشعر ..
وياحلم في راسي ..
بخطوة زمن .. محفّض .. وراسي
بيرقص بنخله ،
ويطحن دريس ،
وياكل عيدان،
... ما تسألش حاجه
دا صوت الأذان .

حبيبتى سماره
كلامى اللى جايلك .. عزيز من دوايا
دوايه بتكتب .. دوايا الشفا
ونادرن عليه يا ست البنات
لأستل سيفى .. واجيبك بكيفى ..
حمام المحبه ف بنانى الدفا
واروحك بلاد الغيلان البعيده ..
أجيب من حداهم .. شيطانهم وغلى ..
يكانوا الضحيه فلى ليلة زفافك
واصفصف دماهم .. واحنى إيديكى
عشان العيال اللى لسه ف خيالهم ..
حنائه .. وخوفهم ..
يعيشوا فى سلام .

سنين ..
ويا ما مرَّ من السنين
وكننت باحلم ياما .. ياما
وكان بيتهياً لى اكثر ..
وعقلى يتحول لبير ..
وا سع
غو يط
واسرح لوحدى فى غيط نهار
تفرد عليه الشمس خير
يصبح خيال القلب غيط
من غير ما اطيير .. يسير
والخطوه تتودد لخطوه
والعين تزوغ جوَّ القرار
أشوف حنينى وشوقى عيل ..
عمال بيحبى فى التراب ..
يكتب حروف أول جواب

باحب أختي
باحبك أنتي
ومن حيطانك.. بتيجي بنتي

واشعر كياني بتسرى فيه رعشه .. ينمل ..
واتنفض
ولما قلبي بيتقبض ..
« اللهم اجعله خيرا ! »
واحضنك جوّه ف خيالي .. وانبسط
واضحك .. واطير ..
واخاف واكش بضحكتي
من كتر شدة فرحتي .. اسكت وأقول ..
« اللهم اجعله خيرا ! »

ماداريش عليكى ..
خايف من اليوم اللي جاى ..
وخوفى من غدر السنين .. اكتر !!

- ٦ -

شدّيت قلوبك مركبى ..
دراعى، والصواب ..
فروع لشجره مايله ..
طالها الريح فى الخريف
وتناها لحدّ فوق - صارى
وصلّبها - شمس العصارى - قلّع .
وتحرّمت بخيالى .. وبصبرى .. والسنين ،
لجل الطلع اللى طالع ،
من جوف صدرى الملهب ،
صهّد ، وحنينه والى ..
من كتر شوقى ليكى .. على أوّل السّفَر!

حبيبتي سماره ..
يا أول حقيقه رقيقه بتفتح طريق البدايه لسكّه
طويله جميله مالىها المزار ! .
وقلت اما اكسل ، واعسل شويه ف ضلال التردد
.. ويكره الخيف / وشديت فى صارى المراكب
دراعى .. صوابعى / فروعى اللى مايه ، وطايه
رياح الخريف ..
تناها الفراغ اللى حزم دماغى بصبر السنين
وصليت كثير
وكانت صلاتى بتجرف كيانى لعالم كبير
واحسّ بحنين اللى غارق فى بير ..
وملهوف وخايف
وتنزل دموعى بحور المحبه
غسيل الجوارح .. وشوق الوصول .

- ٨ -

لَوْنٌ .. كل ما يَفْضَلُ فى بطن الجوع .. أَلَم مُشْبِع

!!

وتتحرَّشُ دروب الوقت للواقف فى لحظة موت

يهيج الصمت.. ويشعل فى جوفه النار/ وتبقى

الكلمة جمرايه .. تقيد .. تولع

(لَوْنُ العالم الآتى يكون بركان ...!)

لكنك اقلع هدمى السافله .. واتملَّص ..

من التبعية للأشياء ..

ولِلإنسان !

- ٩ -

ولما صَحَّحْتُ انتباهي
كانت حبيبتى طير خيال ..
والزمن مدد فى قلبى
لسه المسافه ما انتهت

١٩٨١ / ١٩٧٦

مواويل على طريق السفر
[سنين الضيق]

أُتمشَى ...
فى الشارع يتمدّ المشى ..
يتلون أسفلت الأرض
يتلملم ..
يتحول دبشه ..
وبترسخ على صدرى جبل
أتللم .. وأشدّ ف نفسى ..
وأحاول أترحز حبه ..
ألاقينى فى البحر غريق
والموجه بتحدفنى لموجه
وبتشعل فى الأرض حريق
والناس بتهبش فيه
وبتسخر بكلامى الهايف !
ويبصوا لبعض ويندهشوا/ ويقولوا ..
(ما هو أصله عبيط وماهش شايف ..
مين يقدر فى الأزمه يلبط !!!)

واتمشى ..
فى الشارع يتفرد الحلم
يتلون أسفلت الأرض
يتمدد ..
يتحول بسمة
وتهف على قلبى أمل
أتمخطر ، وانشد لفوق ..
تترحل رجلى فى البير !

أول صفحات التعبير :
أتمنى ينزاح القفل
وأفتح لى شباك للريح ..
وأتمتع بنسيم البحر ..
وأقلع من غيطى المسامير

وأتمشى ..
والشارع يلمع
واحلامى يفهمها كثير .

- ٢ -

الليل يئنّ ..
وصوت عويل الندب يعزف فوق ألم صدر اللى كان
يعشق هواه موآل شجن !
ويعيد غناه
والآهه .. ترسم ع الخدود علامات
متلوّنه بدمعة حنين
وحنيّنه ، وانتى على طول السنين صفحات عنا ،
وصغر سنّ
يا نادية
يا للى بتسكّنى صدرى الصغير ، من زمن

صدرى كبر
صبح عريض
ودراع حديد .. وعقل جنّ
وانتى بعيد
وأنا وحدى جوّه الليل ماشى أَوْن
والليل ،
من كتر ما هو فاضى الوفاض ،
عمّال يئنّ

طشاش الشوف / ستاير غَبَش / رمادى الريش
أطير ما أطير
ما .. شى ، ما ... فيش
حتاتى ليل بيوت
نا ... هنا... ك !!
أطير ما أطير وطاير ع العشوش ، الشوف
ما ... فيش
شعاع
برارى، والبيوت الطين غَبَش
حتاتى شفق، قلبى
هاجج على حجرى حجر هجر

وسابنى فى البيوت الطين

بشر !!

بشر !!

بشر !!

والقمر ، طوبه ، انهبد

شرخت جداره الأرض

خَرَّ .. وَ

سَجَدَ !!

وسابنى فى البيوت الطين ، حنت/ شفق

برارى ...

والشوف طشاش !!

- ٤ -

تَنْيَّةُ اللِّسَانِ .. كَوْبَرِي
تَخْطِي فَوْقَهُ ، مَرَّةً
عِ الْقَدَمِ ، وَمَرَّةً
عَلَى صَدْرِي
مِ الْحُلُقِ لَمَّا لَسْتَيْنِ الْأُولَانِيَيْنِ
سَكَّةَ سَفَرٍ ، طَوِيلَةَ الشَّرَايِينِ
مَمْدَدَهُ مِنْ طَلْعَةِ الْمِيلَادِ ، لَمَّا
لِلْقَبْرِ الَّلِي فِي الْخَلَا مَسْطُوحٍ ، يَفْكُرُ فِي السَّنِينِ

« لسانك حصانك » فى ساعة المعارك/ تبارك،
تشارك
ترمح به ع المشاوير ، تشاور
نهارك .. يموت !
والليل ...
قبر فى الخلا مسطوح يفكر فى السنين
« ان صنته ..
صانك »

والفرق بين البيت ، وشارع المخلوق ..
كوبرى ،
تخطى فوقه ، مره
ع القدم ، ومره
على صدرى !!

- ٥ -

لا تلوينى السُّكُّ ..
ولا حَذْفُ الْمُعْطَفِ
لى المَلَاوى شين .
والورد لو ينْقَطِف ..
يبقى عشان الزين ..
تصحى
تبات
تنخطف

ولا الملايه اللفّ !
ولا رنة الخلاخيل !
ولا فرقعات الخيل !
(يا ست ياستنا .. هيهدوا منى الحيل)
ولا عقلى منى انهفّ
إنما الكلام بميزان

لا تلوينى السكّ ..
ولا فى الخفوت حنّحدف
يبقى البداية منين ؟

النَّزَّ لَوْ فِ الْعَيْنِ ..
حَطَّيْنِي جَوْهَ النَّتِيِّ .
مَدَّ النَّظَرَ حَيْطُولَ
وَالَا أَنْتِي دَائِمًا كَدَه .. مَا بَتَشَوْفِيش لِجَعِيد ..
رَجَلِيكِي هِيَ الْمَدَّ ؟!!
طُولُ السَّكِّ شَبِيرِينَ .
وَالشَّبْرَ لَوْ يَنْهَدَّ .. يَبْقَى شَبْرَبَرٌ طَال
وَالشَّبْرَ عَدَّ الْبَرَّ

قُصِّرْ الكلام ، على فين ..
والدنيا دائماً حَرّاً !
قطر الندى ع البر ؟!

لَيَّ الملاوى شين ...
والورد لو ينقطف ..
يبقى عشان الزين ..
تصحى ..
تبات ..
تنخطف ..

- ٦ -

وتيجى السنين .. بحالها ومالها ..
وكل اللي ليهاف رصيد الزمن من الذكريات
حلاوه ومراره
تعدى علينا
وترمى بحراره .. سلامها القديم
بكل الكلام اللي جو الكتب ..
وفوق الحجاره ..
وطمى الليالى فى نيلنا العظيم ..
بترمى السلام ..

«سلامو عليكم يا أهل الزمان
سلامو عليكم يا أهل المكان
زمانكم ،
مكانكم ،
مالوش غير أوان
أوان المحبّه ما تطرح حنان
وتبقى الضماير ملانه بتاريخ
تاريخ اللي فاتو ، وفاتولنا تاريخ

ونكتب فلى يومنا تاريخ النهارده امتداد للتاريخ
دا شجرة حياتنا، فروعها الطويلة ،
امتدادها جذور!
ماتيجوا نزوروا ف طريقنا القبور !..

آدى الأهرامات ..
وآدى الأضرحة !
مدد يا حُسين .. ياستى يا طاهره .. يا بيت النبى
تاريخكم علوم !

- ٧ -

بتيجى الليالى .. ونسرح بعيد
يعدى الحواجز .. خيالنا الشديد
ويصبح ويمسى فى وقته البعيد .. كأنه النهارده

فى أرض الشارع ده ..
زرعت الخطاوى حنين واشتياق
وكانت بعنف المشاعر ساعتها ..
بيهتز الجسد فى احتراق !!
واصرخ صريخ مش عارف له سمع
ولا احس غير باصطراع الوجع
وإن الميدان الكبير صار زقاق !!

فى نفس الشارع ده ..
انتشيت فى الضلام وانتفضت
وانتيت فى العجين وانفردت
واتغزرت ف شواشى المنام ...
واماً فُقت، اندفعت ، انخبطت ،
انحدفت، وحضنى الفراق
والميدان الكبير صار زقاق

سنين وانقضت ، وانتبهنا
ونفس المعاني الجميلة انتهت
يا ليلي .. يا ليل المدينه
أديني باجيك من جديد
يا ترى راح نعيش فى ده تانى ..
ما اظنّش !

- ٨ -

تتمدّد الشطوط ..
بطول جوار البحر ..
تتوّنس بالنفّس
تتمدّد الشطوط ..
وتحس بالارتياح ..
والراحة والأمان .
تتنهّد الرياح ..
يتبسّم النسيم ..
ويميلّ الزمان .

البحر ليه بيندفع جوّه ف حشاه !
بيلمّ نفّسه ليه بعيد عن الشطوط !
الريح بتعصف والشطوط خطوط خطوط ..
هوّه الأمان سافر معاه ؟ !

معاه لفين ؟
وتاخذنى فى السكك الطويله الكلمتين
معاه .. دامين ؟
ومين معاه !
متنتورين بعض الحروف مالهمش معنى
وان حضنوا بعضيهم كلام مالهمش معنى
والمعنى نفسه ما عايش بيلاقى الكلام
يادى السنين ...

ويميل الزمان .. ويهدى فى خطوته ..
ويرسم فى الخطوط .
تتنهد الرياح ..
وتمدّد الشطوط .. بطول جوار البحر ..
ويخمد النفس .

وايه افتكّر .. ؟!
ما كل الكلام القديم انتهى
ما عادش الزمن بيرمى فى حباله لبحار السنين..
ويسحب لشطّه المحار والطلاسم ..
وحبّ الأغانى ..
وطرح الأمانى ..
ونار الحنين !!
وليل المطر - فى بطن الليالى - بيرسم صور
صور صور .. بتطفح فى راسى ..
ويرسم خيالى بلون الحجر
وشكل المأسى
ولون القمر ..
صور صور
لناس فى الليالى بتبقى صور
وناس فى الليالى بتبقى حجر
وناس فى الليالى بتبقى قمر

ومين اللى ببقى
ومين اللى باقى
ودنيا الليالى سواقى سواقى
بترسم صور
وتقلب صور
وتطفح قلوبنا كثير م العبر
ولا بنفتكر ..
وايه افنكر ..
ما كل الكلام القديم انتهى !!

- ١٠ -

باحبك ..
ومين انتى يالى باحك
وقلبى يشد الرحال الشدايد ..
ويسعى لقربك
ليالى مسافر ، وأطوى السكك ..
يشتر العرق فى صفحة جبينى ..
ويكتب حروف الشغوف اللى سارح
على كل حيطه .. فى كل المطارح
ومين انتى يا للى هواكى لطشنى
وسابنى عليل الهوى فى الجوارح ؟

أدورُ عليكى .. وادور فى الزمن
واعد الدقايق واخطى المحن
الاقى خيالى ف هواكى طرح
وسال ع الجبين الحنين والفرح
وباشرب عطش
وباعطش محبّه
ومين اللى يفهم كلام الأحبّه

وحيد فى الليالى بدونك وحيد
وفين انتى ياللى تعبّنى هواكى
وخلانى اعيد الطريق من جديد
صباح كل يوم ؟!

أَتَنهَّد ..

تطلع تنهيدتى تبخّ النار
ما هو صدرى مولعٌ جوّه حنين
وامشى فى الليل - على صوت الريح -
أرقع بالصوت الغنا - موأل
ويا ليلي يا عين ..
يا حبيبي واخذنى الشوق على فين
على سكه مداها سنين وايام ..
والا الأحلام .. بتاخذنى .. أناام
واهرب من حظى وقدرى معاك
وطريقى التايه جوّه بحور الليل الويل
أه يا عينى يا ليل ..

مش لاقى دليلى ياخذنى معاه
مش لاقى ف صدرى غير الاله
وكلام يتغنى على العاشقين
وحاشوفك فين ؟!
وسلامى حمامى يطير مع مين
مرسالى لمن
وأنا وأنت ف ليل الغربه سنين
عاشين تايهين
ويا ليلي يا عين ..
قدرى ومكتوب
قدرك مقلوب
ونسيب السكه الصبح لمن !
ونروح على فين
وحنفضل كده على طول تايهين ؟!

١٩٧٥ / ١٩٨٠

فضضة

وباكتبك جواباتي
ولا اعرفشى منين أبدأ
ولا اعرف تكون ازاي خطوط السن ع المفرق ..
طريقنا فين ؟
منين الضحكه تتفرق على ايامنا
ويقسمنا الرغيف نصين !
منين ..
والكلمة لو تبدأ بمنطوقها تدوب في الطرف
منين ..
والحرف جنب الحرف مش لاقين لهم معنى
منين ..
ولإمتى حتسبنا مضاجعنا ..

ونار الكلمة توجعنا
وطعم البسمه يشبعنا ولوجعنا
منين كلمتى تبدأ .. واخط الحرف من تانى ..
وأكتبلك جواباتى ..
وعنوانك عليه حراس !؟
منين يا ضحككى الفايته باهاتى
سنين ع السكة وباهاتى .. وأنا محتاس
على الله صوتى يوصلك !

الأرض فرُضَ الحبَّة
نُحِطُ الحبَّة .. تطرح رغيف .. الكل يأكل بالهنا
والضحكة تطلع من هنا ..
من قلب مفتوح للحياه ..
للشمس
والريح
والمطر ..
ونسمة الضلَّة اللي هبَّه
من النفوس العفِيَّه
اللي ما بتستخبَّه
وواضحه زىَّ الشمس
عفيه زىَّ الريح
سخيه زىَّ المطر
ما يهمهاش الخطر .. فى وقت زُنُقَة أحبه
أو نهنْهات الحسره من جوه قلب الشريف

- ٢ -

إنّ إنتنتيت من لسعة البرد المتكتك ف آخر الليل
على السكه السداح
ولا كنتتش مخريش وشوش الدنيا بضوافرك ،
ولا بتفرك عرق يومك على الجته
ولا تعبان ، ولا قلقان ، ولا المشوار بياكل نعلك
الدايب يطول جلدك يسييه جراح

كثير مرتاح على صدر الهنا ، والنوم يصاحبك ،
معاه الحلم والأنغام، وفي الحته ..
يبصّ الناس عليك م القهر والحرمان ،
وفين يا زمان .. ماكنتش ليه علينا براح
وصاح الديك على الكتكوت ..
تعيش وتموت ..
وترضى تعيش على الفتفوت وع الفتّه

ويا ما البرد فى الشتوايه بيغطيك ،
وبيدْفِك رضاك اللافح الصداح بنار الفرن
يا معفَن عشان الكل.. إلاكُم يا إِيّاكُم !!
عرفت السكة والأسباب ..
يا سيد الكل يا مرتاح قوَى

عبد القوَى ...
اللى نفسه يبقى وياكُم ..
جدع ..
مشكاح ...
سوى .

- ۳ -

إستقبال : -

أهلا أهلا بالأحباب
نورتونا بعد غياب
جبتوا الخير وياكو وجيتو
ورده وكلمه فـ قلب كتاب
بنحييكم .. ونهنيكم
وبندعليكم كل صباح
ربنا ما يردلكم باب

تعليق :-

وشوش تبوش م الخجل
تنضح سيول
من كل عيب اتغزل فوق العقول
يحجب ضياء
وشوش مرسومه رسم
مالهاش لا لون ولا كسم
تشبه وشوش ياما ...
يطويها نفس الاسم !

- ٤ -

لما خطانا الأمان ...
واشتعل رأس الزمان جوه قلبي واتنحل .
دارت الأيام دواير
كل دايره .. صوره طارحه ودم فاير
عمر سابني وارتحل
فيه أماكن
فيه بيوت
فيه بشر
كله سافر بالعجل
واستريحت وسرحت

(كنت بالعب ويا نفسي
وارسم العفريته صورتي ..
خارجة من حدوده كانت
فى المنام تحكيها ستي من زمان :
حلوه يا ست البنات ..
ياللى شعرك ساسابان
ينزل الترعة الغويطة
يستحمى بالقمر

والقمر من يوم ما بان..
أجرى بالمشوار عليكى
نفسى أخذك من إديكى ..
وادفنك جوّه فُ ضلوعى
تسمعى صوتى اللى حشرج م السكات ..
وصمت جوعى
وأنتى والعفريتة صورتي ..
تفرحوا فرحة رجوعى من الحكاية للحياة
وأرجع ألعب ويا نفسى ...
ينكشف صبرى ومداه)

سكه تانيه للحكاية
تنتنى وتعود تغنى
فى الحكاية .. من زمان تحكيها ستى
حاحكيها لك يا حبيبتى :

كانت على شفا حفرةٍ من نار
والشمس ماشيه ع الجسور من بدرى
تستطلع النهار ..
وتفرق النعمه

قلبي اتنفّض .. حمامه بيضه بميت جناح
طارت على جبال الشوق ووديانه
بصوت ملىّان بنائى اللهفه والأتراح
تتسابق مع النسمه .. وتحارب الأشباح

(لفين يا خدو القمر منى
وهو السكه والمشوار
يا دوب فجرى طلع ع الدار ..
وانا مداح فى بقى الكلمه حراقه .

وبالمشوار ..
أفوت ع العمر بسنينه .. دقيقه دقيقه
ومش منى ولا بإيدى
وكنتى صابره يا صبره
وانا ملاح ما بين الناس ..)

أغنية: -

ندعُ المطر ع الأرض بتطقطق ودانى
ينطش قرن البطن بالحُبِّ فد ثوانى
الزراع لخضر ع الجبين مالوش ميعاد
تنضح كفوف العود ..
وتعرق بالأغانى

أنا كلت من ده .. وعشت في ده من زمان
كان العيال ع الأرض بتخاف في حنان
والأرض كانت بالحنان برضه تحن ..
وكنا نلعب بالأمانى
وكل واحد له مكان

.....

صدقنى ، مانش بانجديف على أى شىء
إن كان نصيبى فى البرام حاكل معاك
وان كنت لسه الحب مادانيش عشيق
مسيرى يوم حقولك
ع اللى وقعننى ف هواك !

الختام :

باحبك والحنين قاسى
وحرقة نارى ف ضلوعى بتشوينى
وتروينى بخيال فضفاض ..
بتجرى ميته ف راسى
فاشوفك فيه
عروسه بتبدر الوادى بعبير فواح
بريحة الرز والغله
وفاسى تضمها كفوفى

وجرح شراقي جار صبعي
بيتنتور منه طين خوفى
عشان ما ارتاح ما بين ناسى
عشان ما اقولش يا ظروفى
واداريكى بعباية الشوق
وانقش فوق جبينك كل احساسى

وصابرك طال بى يا صَبْرَة
وحبل الصبر لو يطول حيوصل فين ؟
مادام القلب جنب القلب
مش محتاج له حبل يطول
لكن حنقول ونحكى لمن ؟
أهه

صابرين
ومش عارفين عناوين بعض
رفيق الرحلة والأحلام

القصائد

7 بداية السفر
25 بحور المحبة
41 سنين الضيق
71 فضفضة

صدر للشاعر

شعر :

- ١- كتاب الطلوع، مطبوعات مجلة الرافعي.
- ٢- مقدمات الغزل، الهيئة العامة للكتاب (كتابات جديدة).
- ٣- الدوران حوالين النفس (هيئة قصور الثقافة)

تحت الطبع

دراسات :

- اللغة الطبيعية (دار الوفاء، بدنيا الطباعة والنشر)
الاسكندرية.

شعر

- ١- ومن كل المعادن ناس (الوفاء بدنيا الطباعة والنشر) الاسكندرية.
- ٢- طبول تشتعل في فمي (دار الوفاء بدنيا الطباعة والنشر) الاسكندرية.

التجهيزات الفنية والتنفيذ : سما للنشر والتوزيع
٢٩ شارع الرشيدى ، القصر العينى القاهرة